

Reunion urgente a ser convoca pa awe

TENSION DEN CUERPO POLICIAL

ORANJESTAD(AAN)—Awenochi na Pova lo tuma lugar un reunion urgente cu a ser convoca pa e Bond di Polis. Segun informenan, por papia di un tension creciente den Cuerpo Policial y segun DIARIO por a comprende for di informenan e reunion di awenochi lo ta uno pisa.

Ayera DIARIO a papia cu e dirigente di Bond di Polis, Merkies, kende a bisa cu mester yega na un solucion pa e situacion cu ta hopi tenso. Merkies a confirma cu e cantidad di agentenan policial cu kier haya traslado a aumenta awor pa 50, di e 180 y pico agentenan cu ta laborando na Aruba, incluyendo aspirantnan. Pero no ta e cantidad cu ta causa mas preocupacion, manera e calidad, comoquiera cu hopi di esnan cu a pidi traslado ta esnan cu ta encarga cu servicio especial profesional den e Cuerpo.

E agentenan kier tende di Gobierno kico ta bay pasa, y e directiva a haya e yamamento urgente pa yama un reunion.

Señor Merkies a bisa cu Ministro di Justicia ta dunando tur atencion na e desaroyonan, pero cu un solucion mester bini di e Gobierno Central den su totalidad.

Ademas un reunion importante cu no a tuma lugar ainda ta e reunion entre e Ministro di Justicia y Gobierno di Aruba. E reunion aki lo por ser spera e siman aki o otro siman.

Awenochi pues e miembronan di Bond di Polis ta bay reuni y mientras e Presidente di e sindicato mes no kier a bisa ni por a bisa kico lo bay pasa, e situacion den seno di Cuerpo Policial ta muestra den direccion di tension creciente.

BERDAD NUNCA A PER-
JUDICA NINGUN HENDE
NINGUN CAUSA NI NIN-
GUN NACION

DIARIO

DI ARUBA

Bo Matutino
Netamente Arubiano

DIAHUEBS 24 DI JANUARI 1985 AÑA 4, No. 1237

Segun observadornan politico FECHA DI ELECCION MESTER SER ADELANTA

ORANJESTAD(AAN)—E actual situacion ta demanda pa adelanta na forma urgente e fecha pa eleccionnan pa asina duna Pueblo oportunidad pa papia atravez di urna electoral y asina baha e tension reinante.

Esaki ta opinion di varios observador politico na DIARIO. Puntra pa nan opinion, e informantenan cu experiencia politico a bisa, cu mirando e situacion mester bisa cu Pueblo mester haya un oportunidad pa duna su opinion. Di e forma aki por averigua si e actual Gobierno Insular tin e respaldo ainda di Pueblo pa ejecuta su manejo mientras cu pa garantiza tranquilidad mester haci uso di e posibilidad democratico pa Pueblo papia.


Proclamando un situacion di emergencia cu lo por haci posible pa medidanan especial ser tuma pa adelanta e fecha di eleccion, ta haci posible pa gobernacion funciona, comoquiera cu e opinion di Pueblo a ser sondea.

PARTIDO NOBO DEN FORMACION?

ORANJESTAD(AAN)—Rumornan persistente ayera a indica cu Remie Zaandam, cu actualmente ta na Aruba, lo ta preparando su mes pa presenta cu un partido nobo.

E rumornan a indica cu ya e partido lo a ser funda. DIARIO a trata di drenta den contacto cu Zaandam ayera, pero no a logra pa haye pa asina por a haya confirmacion o rechazo di tal informenan. Awe Redaccion lo persisti den su intentonan pa localize.

GANADORNAN DI ROADMARCH Y CALYPSO



Ayeranochi den Lago Sportpark a tuma lugar eleccion di e Calypso King y tambe Roadmarch. Como Calypso a keda eligi Mighty Talent cu Complaints, mientras cu Roadmarch di aña a bira Road on Fire, canta pa Mighty Cliff.



ECO Agency Aruba, N.V.
your custom broker & Agents
for all your shipping needs

Adres: Tomatenstraat #2
Phone: 26034-21726 Telex: 5188.eco.ag